

Kerwered 2006

Ohfang

Därf ich mol bitte um Ruhe bitte, das is e ganz ehrenwürdiger Tag,
ich erkläre glei, was das verheisen mag.

Erschd sahn ich emol Gunn Dach,
bevor mer mitenanner grien de kreschde Krach!

Ich grüße Euch ob nah ob fern, do iwwe unn do driwwe,
owwe un unne, alle sinner mit ingenumme.

A alle Italiener, Pole, Franzose unn so weiter sinn mit ingenumm,
unn bei uns uff de Kerb herzlich willkumm!

„Die Welt zu Gast bei Freunden“, das is es Motto vunn unser Welmeisterschaft,

Ich hoffe das honn jetzt a die ledschde gerafft,

Sogar die Hollänner durfte diesmol metspeelee,

Ins Finale kumme se net das kann ich eich jetzt schunn vezeehle!

De Weltmäschder wärd wohl Deutschland heiße,

Da die Reerer net metspeelee dürfe, kann ich do druff ruhisch veweise.

Kumme mer mol widder serick uff unser Feschd,

weil das is näwer de WM noch es aller beschd.

Do näwer mer is mei Mundschenk de Aachder,

was der macht is mir eigentlich worschd,

hauptsach er sorgt devor, das ich do jowwe net verdorscht!

Nä ach was, der schlad sich schunn wacker,

das is vunn dene Leit vor uns nämlich de Owwermacker!

Zeig mol was raus kummt bei deine schreie,

KREISCHE!

hoffentlich kann uns de Marschall do iwwe die Lautstärke nochemol vezeihe!

Bevor mer jetzt loslehe, muß ich noch was sah,
das geht jeden uff der Kerb was ahn.

Also de Achder unn ich, mer honn beschloss,
das mir...

Ach wisse ner was, ich Quäle eich heit,
dodezu is am Schluß ah noch Zeit!

Do werr ich eich mol vunn denne dolle Berichte,
paar vunn denne kann ich vunn do jowwe schunn sichte!
Angschd brauche ner net se honn, ich honns ah net
obwohl ich iwwer de äh odder anner hetze,
Wanns nom Mann am Deich gäng,
mischd sich net ich, sondern de Aachder ins Gefängnis setze!

So, ich ded sah, mer lehe los unn losses Krache,
doch vorher machd de Aachder noch ganz annere Sache!

Batsch Senior

De Vadder unn sei Bub, die do owwe wohne in de Selberschstroß,
also bei denne is immer was los.

Vunn denne kännt ich Eich e Buch schreiwe,
do breicht ich sunnsch de ganze Daach nix meh se treiwe!

Wobei de Bub noch schlimmer is wie de Babbe,
denn känner ah, der wärd ah jetzt die ganz Kerb so vepeilt do erum schlabbe!
Trotzdem loss ich mers net nämme unn berichte erschd mol iwwer die ältere

Generation,

weil de jung hodde mer glawisch in jeder Kerweredd schon.

Samschdachs owends wars, mer lässt sei Awed irgend wann stehe,
weil mer will owendes jo noch met de Fraa ausgehe.

Eninn ins Bad unn ferdisch mache,
dusche, raseere, wesche unn all die Sache.

Die Fraa is schunn am hetze,
wann mer pünktlich sei woll, mischde mer uns jetzt mol langsam ins Audo setze!
De Batsch steht am Spieschel unn ruft: „Ich kumme glei,
mei Hoor müsse richdisch leie, das muß schunn sei!“

Schnell noch e bisje Schaum eninn geschmeert,
dann leie die Hoor a speeder noch wie sich das geheert.
Druff uff die Hand unn dorschs Hoor gezoh,
so macht das es Herz jedes Mannes froh,

Das war soweit alles gut unn schää,
die Hoor honn wunnerbar uffem Kopp geläh!
Wie e äns hot das ausgesieh,
so gräd ich das niemols hie!

Nur der Schaum is net weggang, a met noch so viel reiwe,
das kände se doch uff de Packung mol näher beschreiwe!
No langem reiwe unn bärschde denkter sich, ich glaab ich spinn,
das do hot doch iwwerhaupt kä sinn!

Ich läs jetzt mol was druff steht uff derere Doos,
weil das do, das geht jo voll in die Hoos!

Also, do steht: „Auf die Hand sprühen und dann gut einmassieren!“

„Das geht die doch e Scheiße oh was ich demit mach, das hat die jo garnet zu
interessieren“!

„Dann mit der Nassrasur beginnen!“

Ja honn dann die de Arsch uff, ich will mei hoor lehe,
ohne das ich mer de Kopp rasier,
dann wär es aus zwische meiner Fraa unn mir!

Uff ämol sieht der was, er glaabts jo kaum.

Do steht jo ganz groß druf „Rasierschaum“!

Ach got bin ich so bleed,

jetzt is mir a klar, warum der schaum net so äfach weg geht!

Die Musik speelt dem Batsch was vor,
net alles was babbt is a gut fer die Hoor!

Reisegewohnheiten

Jedes Jahr es gleiche, es dud mich schunn richtig veletze,
Müsse mer in de Redd iwwer die Reisegewohnheite vunn de Reerer hetze.
Bevor sich ähner iwwer wiederholunge beschwert,
ich schreiwe nur das, was a werklich is bassert!

Am Mudderdach, is jedem bekannt,
do nämmt mer aus Ohstand sei Familie an die Hand,
do wird emol e schöner Daach gemacht,
das is jo fer uns Männer kä Sach!

So hon a drei aus Roth gedenkt,
unn schnell es Audo vor die Hausdeer gelenkt.
E ninn mit de Fraa, Mutter unn vunn mer aus die Schwiegermutter aach,
dann kann das nur wärre e richdisch schääner Daach.

Moijsens fit wie e Turnschuh, de owend defor extra nix gesoff,
so honn sich de Ulli unn de Dedde beim Herold vor de Hausdeer getroff.
Doch bei dem äne Treffe solls net bleiwe,
das wär ich eich awwer glei beschreiwe!

„Los geht's!“ saad de Herold unn met große Schritt zum Audo hie,
met em selwe Schritt hot mer ne Freidachs als richdung Schäres laafe gesieh!
Also isser gut gelaunt unn fit, muß ich defieniere,
sunschd wärer, wie vunn Schäres häm a gang uff alle viere!

De Herold los, de Dedde hinnenoh,
ganz am Schluß kummt de Ulli hinnerhergefloh.
So sinnse dann ganz unfedross de Mühlbersch enunner
in Richdung Laudre geschoss.

In Olschbrigge wars dann soweit,
im weg steht e Audo unn jeder macht sich fer se bremse bereit.
De Herold langsam gemacht bisser irgendwann do steht.
De Dedde, ganz gemietlich wie er so is, zeigt seiner Fraa, das a sei Brems geht!

De Dick Ulli denkt, wie kann mer dann so bleed parke, das ich do jetzt bremse muß,
ich glaab die zwä honn wohl e Schuß!
Das is mir doch egal, ob die do jetzt stehe,
Wann ich kumm, muß das weitergehe!

De Fuß uffs gas unn Ohlauf genumm,
so isser dann voll Stoff vunn hinne ohkumm!
De Dedde gried e großer Schreck,
als de Ulli parkt sei Audo bei ihm im Heck!

Basse moluff, denkt de Dedde, das mache mer so,
unn is mit vollstoff a noch beim Herold hinnenin gefloh!
De Herold denkt, ich glaab ich sterb,
mer sinn doch net uff de Boxautos in Roth uff de Kerb!

So honn se dann do gestann unn se dritt geheilt,
weil se ehr Autos honn innenanner verkeilt.
Awwer jetzt, kenne se mer bestimmt mol winke,
die wärre uff de Kerb noch schää samme äner trinke!

Die Musik speelt dänne drei weil se sin so leeiert,
wer se erschd bremst, der veliert!

Fahrradklau

In Roth bassere die dollschde Sache,
die Erfahrung muschd a e bravie Reererin mache.
E neies Fahrrad hot se sich vor kurzem erschd kaaf,
schlehd gefahr is immer noch besser wie gelaaf.

Moiens uff gestann unn uff de Sattel schwinge,
so kann mer schnell erledige die äfachsche Dinge!
Schnell noch e paar Klänischkäde kaafe, ich brauch jo net viel,
unn so war dann de Bäcker ihr großes Ziel!

Vorm Ingang steht noch e Fahrrad an de Bäckerei,
jo, do stell ich doch meins dann grad debei!
Ab eninn unn die Einkäufe gemach,
das geht jo schnell unn is jo kä Sach.

Wie se wirrer raus kumm is, denkt se, „Dunnerkeil, bin ich dann beknackt,
do hot jo jemand mei Fahrrad ingepackt!
Nur das alde Ding näwedroh honnse stehe geloss,
die Diebe geheere jo erschoss!“

Do erumm gerennt isse unn dud die Welt verrickt mache,
Es kann doch net äfach jemand klaue mei neie Sache!
Die Gertrud vunn de Bäckerei,
rennt a schnell debei!

Ich glaab ich honn de Dieb gesieh!
Warde mol korz, dass krieg mer widder hie?
Die Fraa, derer wo de annere Drohtesel geheert,
die hat äfach das met genumm, unn sich net weiter droh gesteert.

Da mer sich jo in Roth soweit kennt,
hot die Gertrud ah net lang gepennt.
Ans Delefon unn ohgruf fer das ganze se kläre,
unn sich emol bei dem Dieb se beschwere!

Doch am annere die Fraa frot ganz unbeschwert,
ja war das Fahrrad wo ich metgenumm honn dann verkehrt?
Mich hots schunn gewunnert das hot sich so leicht fahre geloss,
unn außerdem war ich ruckzuck hämgesschoss.
Do hat die gut Fraa jo nochemol glick
Unn kriet am selwe dach noch ihr Fahrrad serick!

Die Musik speelt derer Fraa zur Ehre,
in Zukunft frohsche vorher, dann dud der a niemand e Probefahr verwehre!

Sprüche

De Batsch racht Zigarette aus Holland wo druff steht: „Roken is dodelijk!“
Er iwwersetzt: Rauchen macht dudelig!

Es Manu stellt fescht: „Die Chance das mer mit zwä Würfel e drei werft stehe
50:50!“

Lach sich de Christoph kabutt. Sahts Manu: „Nä quatsch, ich mähn doch halwe-
halwe!“

„Wenn ich nix esse, muß ich de ganze Dach ans esse Denke!“
Zitat Raph

„Die Manu hot e Fraa unn e Kind dehäm!“
Zitat Dobbewelck

Noh ner halwe Flasch Bier: „Mann, mir sinn doch ganz normale Assis!“
Zitat Batsch

Olli 2006

Jetzt muß ich eich mol noch vunn jemand berichte,
denn duner ah do unne uffe Kerweplatz sichte.
Der is iwwers Johr immer so brav unn lässt sich veel gefalle,
awwer an de Kerb do lässt der als gern mol Knalle!

Er is e schlauer Student,
der sich met de Physik wunnerbar auskennt.
Doch das hattem a bei seim Missgeschick nix brung,
do hot der das mit dene Physikalische größe net so genau genumm.
Bekannt isser jo ah defor, das alles wasser in die Hand nämmt ziemlich schnell kracht
unn irgendjemand froht: „Olli was hosche dann jetzt schunn widder kabutt gemacht?“

Meddachs is de Olli vun Aachen owwe runner hängefahr,
der wollt schnell bei die Freundin, is doch klar.
Es Audo in die Infahrt unn ab eraus,
Die Mamme hat bestimmt schunn esse gemacht, welch e Gaumeschmaus!

Er guggt uff die Uhr unn denkt: „Au, ich bin awwer frie do,
dann geh ich voher nochemol schnell uffs Klo!“
Doch do draus is nix worr, er war net mol kumm bis an die Hausdeer,
als er sich denk, wo kummt dann jetzt der dumpfe Schlaach heer!

Erumm gedreht, awwer nix gesehe,
das genau war awwer jo sei Probläm, do het jo müsse sei Audo stehe!
„Dunnerkeil, wo is dann jetzt mei Golfche anne,
bin ich dann jetzt völlig Panne?“

Oh je,de Olli hots schunn geahnt,
Der Golf hat sich sei weg gebahnt.
Es Audo is ganz ungewollt,
ohne was se saah weggerollt.
Es Lenkrad war awwer richdisch ingeschlah,
unn so isser üwwer die Strooß beim Freedi ins zuene Garagedoor gefahr.

Als Physikstudent hot de Olli dann tagelang gerechelt,
unn is uffs Ergebnis kumm, das er hot beim Parke geschwächelt.
Die Handbrems ohziehe, das is so e Tipp,
dann wär de Golf a stehe blibb.

Die Musik speelt unserm Olli e Lied,
so geht's aus, wenn mer sei Handbrems net zieht.

Fußballtaktiken

Weil mer grad WM honn, unn sich alles um Fußball dreht,
erklär ich Eich emol wie das in Roth so vunn stattet geht.
Do drowwe uffem Sportplatz honn die Mäd ihr Spiel gemach,
das is jo alles noch kä Sach.

De Balle riwwer, unn eniwwer,
gepasst und geschoss,
Alles unner de Aue vum Römer Volker,
de Mäd ihr großer Big Boss.

Doch es Spiel is net so gelaaf, wie de Volker das hät erwartet,
unn so hodder dann in de Halbzeit, e ganz nei Taktik gestartet!

Ich war jo net debei, unn hon net mitkried, was er in de Kabien hot gesah,
awwer mit der Taktik, wärer am liebschde uff die WM gefahr.

„Ich bewerb mich als Bundestrainer, als Ersatz fer de Klinsi,
Weil sowas genieales hot die Welt noch net gesieh!“

Die 2. Halbzeit geht los, mit frischem Elan,
do kummt net emol die Nationalmannschaft dran.
„Eieiei“ denkt de Volker, „irgendwas honn ich vegess,
ach das is net so schlimm, komm, druff geschess.“

Die Mäd speele, doch absolut vergebens,
weil de Volker macht grad de Fehler seines Lebens....
60 Minudde sinn geschafft,
unn de Trainer hats immer noch net gerafft.

In de 70. Minud is de Volker uff ämol ganz weiß,
ach gott, was is dann das fer e scheiß.
Ich honn mich jo do voll veschätzt,
unn so isser schnell in die Kabine gewetzt.

In de 75. Minudd kummt der dann serick,
unn will vetusche sei mißgeschick!
So, ich honn die Reschele nochemol studiert,
unn jetzt wird mei Taktik nochemol korriegiert!

Jeder wunnert sich, ach was machder dann jetzt?
Die Zuschauer am Rand honns nimmi ausgehall
unn sinn vor lauder uffreschung schunn uff de Borrem gefall

De Volker ward bis de Schirri hot unnerbroch
unn schickt noch e Spielerin ins Spiel.
Ja, laut de Regele, dürfe mer mit 11 Leut speele,
unn sinn immer noch net zu viel!!!!

Hoffentlich dud das em Klinsi net bassere,
sunschd kanner negschdjohr mem Volker die Reerer Mäd trainiere!

Die Musik speelt dem Taktische Genie zur Ehr,
mit zehe Mäd dud mer sich äfach schwer!

Bullche

Lang, lang isses her, muß mer schunn faschd sah,
als der Mann es ledschde mol in de Redd drin war.
„Mer wird ruhischer“ hodder vorsjohr noch funn sich gebb,
unn schunn honn ich ne dasjohr eninn geschrebb.

Owends hoggder dehäm zwischem Winnipuh unn Tigger,
wisse ner wenne ich mähne....genau em Hella sei kläner digger!
Er hot emol e Briefche uffs Babier gekrakelt
Unn iwwegglücklich met seim Sch...ienbäh gewackelt.

Vielleicht wars e Geschäftlicher Brief, niemand weiß es genau,
odder e Liebesbrief fer sei zukünftischi Frau!
Uff jeden Fall schreibter do zwä Seite,
ab ins Kuvert unn das Ding uff die Poschd begleide!

Das Ding eninn in de Brifkaschde, ich bin jo net bleed,
ich wäs doch wie das met denne Briefe heidsedachs geht.
Doch dann wendet sich das Blatt,
negschde Dach leider wirrer dehäm bei ihm, Dunnerkeil, was is dann datt?

Nochemol kontrolliere odder honn ich mers bei de Poschd veschess,
Do steht doch groß unn brät die Adress:
Er läst nochemol vor sich hie,
Name: Bullche Bonenberger, das müsse die doch sieh.

Doch es Bullche läst sich net beirre,
unn so sieht mer ne wirrer richdung Poschd schwirre!
Uff dem Wäg dort hie denkt er, die wisse jo garnet wer dänne Brief soll empfangen,
ich glaab das wärre die bestimmt uffem Briefumschlach ah noch velange!

Unn schunn wirrer was gelernt,
das e Brief net ohkummt wenn mer de Empfänger ähfach entfernt.
Also Bulle, in Zukunft net so veel Emails sondern ah mol e Brief uffs Babier
schmeere,
dann kann der sowas a nimmi bassere!

Die Musik spielt em Bullche zur Ehr,
E Liebesbriefche se schreiwe is sau schwer!

Schluss

Das wars ehr Leid, mer kumme langsam zum Schluss,
awwer das mer jetzt niemand hängehe muß!
Im gähedäl, do wird jetzt geblebb,
ich honn doch die Redd net zum vertreiwe geschrebb.

Bevor ner jetzt ohfange am Stännche es Bier in eich ninn laafe se losse,
müsse mer Eich noch was verkünde vunn de owwerschde sprosse.

Die Straußjuchend hots a dasjohr net vesaut
unn de schänschde Strauß im ganze Land gebaut.
Unn was ich noch sah, ihr wärres net glaawe,
das sinn schunn fumm Weltmeischder 2006 die Farwe!

So Herr Bürgermeischder, großer Mann der Politik,
wie finnschen unsere Strauß, is der net schick?

Hesche alleweil was falsches gesah, dann hesche dich bei de negschd Wahl müsse
geelee,
dann heschhe uff unser Stimme därfe nimmi Zeehle.

Jetzt müsser mer dem Ding nur noch e Name zuweise,
so sollche heiße!

Also behannelne immer Pfüglich unn sahn a mol gunn Dach,
dann krien Ihr mit de Starußjuchend a kä Krach.

Am Ohfang honn ich schunn e Anspielung gemach,
unn jetzt für ich mol noch zu Ende die ganz Sach.
De Achder unn ich, mer hon uns entschied un es is uns a schwer gefall,
awwer mer honn jetzt lang genuch es Glas Wein un die Kerweredd in de Hand gehall.

Ich honn das johr mei zehn Johr voll,
unn ich muß sa die Kerb war jedes Johr super toll,
De Aachder hot gesaad, „Wenn Du gehsch, dann geh ich midder,
allä loss ich Dich net, weil das is bitter!“
Danke Aachder, das is e Applaus wert,
Du geheersch vor ganz großer Kulisse geehrt!

Ihr honn uns das Johr net uff de Kerb awwer uff de Läder wahrscheinlich es ledschde
mol gesieh,
awwer ich denke unser Nohfolger krien das wann net sogar noch besser hie!

Bei Eich alle wolle mer uns noch bedanke, das ner jeed Johr met uns honn glacht,
das hat uns aarisch veel Spaß gemach.
Nochemol danke Aachder, es hot mich jed Johr uff e neies gedroff,
ich wäs net was Du met mer machsch, awwer immer wannich do runner gehe bin ich
besoff!

So jetzt entloss ich eich unn wünsch eich noch veel Spaß
Unn dun eich schää vergnüege uff derer Gass!
Unn denken droh, dun immer noch e paar bleede Sache mache,
das mer negschd Johr wirrer iwwer eich känne lache!
Tschüss, machens gut unn feiern noch schää,
dann krien mir wirre e rischdisch schönes Feschdche uff die Bää!

Unn jetzt kummts wie jedes Johr,
de Aachder näwer mir kreischd e ledschdes mol vor!